



Bersama
Prof Dr Taufiq
Yap Yun Hin

Semenanjung Tanah Arab pada zaman Nabi Muhammad SAW mempunyai beberapa agama dan kepercayaan diamalkan ketika itu termasuk Kristian, Yahudi, Majusi dan Musyrikin serta lain-lain yang tidak mempunyai pegangan agama.

Apabila kita melihat kehidupan Nabi SAW, kita boleh memanfaatkan beberapa contoh yang dapat menggambarkan toleransi tahap yang tinggi terhadap mereka yang beragama lain.

Ini khususnya berlaku

HARIAN METRO 6/4/2017 p. 35

Rasulullah tadbir Madinah penuh toleransi

ketika Islam sudah membentuk negara dengan perlombagaan digubal berdasarkan syariat Islam.

Sifat toleransi ditunjukkan Rasulullah SAW ketika berada di Makkah dalam tempoh 13 tahun selepas kerasulan Baginda. Selepas berhijrah ke Madinah, peranan Nabi Muhammad menjadi lebih besar bukan setakat sebagai pemimpin agama semata-mata tetapi sebagai seorang ketua negara.

Baginda memerintah Madinah menurut ajaran Islam bagi memastikan keharmonian dan kestabilan masyarakat.

Sebelum ini, wilayah itu tidak aman kerana sentiasa berada dalam perperangan. Akhirnya, Islam membawa perdamaian untuk semua

penduduk walaupun wujud kepelbagai agama dalam kalangan mereka.

Rasulullah memperincikan di dalam perlombagaan supaya setiap masyarakat menjalankan tanggungjawab masing-masing. Semua penduduk mesti mematuhi peraturan ditetapkan dan sebarang perlenggaran dianggap satu pengkhianatan.

Artikel pertama dalam perlombagaan ini menyebut, semua penduduk Madinah sama ada Muslim, Yahudi, Kristian dan lain-lain adalah dari satu negara.

Seumah mereka adalah penduduk Madinah yang sah tanpa mengira agama, bangsa atau keturunan. Pengikut agama lain

dilindungi daripada sebarang ancaman sama seperti penduduk Muslim yang lain.

Sebelum ini, setiap puak mempunyai pakatan dan musuh masing-masing di dalam dan luar Madinah. Nabi Muhammad SAW menggabungkan puak berbeza di bawah satu sistem pentadbiran yang mengekalkan pakatan masing-masing.

Semua puak perlu bertindak sebagai satu kumpulan tanpa mengira pakatan individu. Sebarang serangan ke atas agama atau suku puak dianggap serangan kepada negara dan orang Muslim juga.

Ini bermakna penduduk Madinah mendapat perlindungan sama rata. Sabda Nabi dalam sebuah hadis yang bermaksud:

Daripada Abdullah bin 'Amr daripada Nabi SAW, beliau bersabda, "Barangsiapa yang membunuh orang (kafir) yang mempunyai ikatan perjanjian, ia tidak akan mencium bau syurga, sedang bau syurga itu tercipta dari sejauh perjalanan empat puluh musim." (Hadis Riwayat Ahmad, Bukhari, Nasai dan Ibnu Majah)

Dalam artikel lain menyatakan: "Orang Yahudi mempunyai agama mereka dan umat Islam mempunyai agama mereka." Setiap mereka dibenarkan secara bebas mengamalkan kepercayaan masing-masing.

Selain itu, satu lagi artikel yang bermaksud: "Jika berlaku pertikaian atau kontroversi yang

mungkin menimbulkan permasalahan, ia mestilah dirujuk kepada Allah dan Rasul-Nya.

Klaus ini menegaskan, semua penduduk Madinah mestilah mengenali pihak berkuasa tertinggi dan dalam perkara mengenai suku kaum dan agama, keadilan mestilah diakui dan dilaksanakan pemimpin negeri.

Suku kaum bukan Islam dibenarkan merujuk kepada kitab masing-masing atau orang alim dalam kalangan mereka. Mereka juga boleh merujuk kepada Nabi SAW untuk mengadili hal ehwal mereka.

Penulis ialah Presiden Persatuan Cina Muslim Malaysia (MACMA) dan profesor di UPM